

首楞嚴三昧經

百七十三
得六

48508



元祿九年丙子二月日重修

皇圖 聖圖 帝 階 級 昌

佛日 增輝 懺 輪 常 轉

山城州天安寺法金剛院置

佛說首楞嚴三昧經卷中六

姚秦三藏鳩摩羅什譯



得

尔時釋提桓因白佛言世尊諸有不發阿耨
多羅三藐三菩提心者不得如是清淨妙身
亦復失是首楞嚴三昧於時瞿或天子語釋
提桓因言諸聲聞人已入法位雖復稱歎愛
樂佛道無能為也已於生死作障隔故若人
已發阿耨多羅三藐三菩提心者今發當發
是人則應愛樂佛道能得如是上妙色身譬
如有人從生而盲雖復稱歎愛樂日月然其
不蒙日月光明如是聲聞入法位者雖復稱
歎愛樂佛法而佛功德於身無益是故若欲

得此妙身大智慧者當發無上佛菩提心便
得如是上妙色身瞿或天子說是語時万二
千天子發阿耨多羅三藐三菩提心
尔時堅意菩薩問瞿或天子言行何功德轉
女人身荅言善男子發大乘者不見男女而
有別異所以者何薩婆若心不在三界有分
別故有男有女仁者所問行何功德轉女人
身昔事菩薩心無諂曲云何而事荅言如事
出世尊云何其心而不諂曲荅言身業隨口口
業隨意是名女人心無諂曲問言云何轉女
人身荅言如成問言云何如成荅言如轉問
言天子此語何義荅言善男子一切諸法不

成不轉諸法一味謂法性味善男子我隨所願有女人身若使我身得成男子於女身相不壞不捨善男子是故當知是男是女俱爲顛倒一切諸法及與顛倒悉皆畢竟離於二相堅意菩薩問瞿或言汝於首楞嚴三昧知少分耶荅言善男子我知他得身自不證我念過世釋迦牟尼佛在淨飯王家爲菩薩時於宮殿內衆嫫女中夜半清淨尔時東方恒河沙等諸梵王來有問菩薩乘者有問聲聞道者菩薩各隨所問而荅於梵衆中有一梵王不解菩薩所行方便而作是言仁者乃有如是智慧善荅所問云何貪受王位色欲餘

諸梵王了知菩薩智慧方便語此梵言菩薩
不貪王位色欲將爲教化成就衆生處在居
家現爲菩薩而今他方成就佛道轉妙法輪
是梵聞已而作是言得何三昧能作如是自
在神變餘梵謂言是首楞嚴三昧勢力善男
子我於尔時而作是念菩薩三昧神力感應
至未曾有處在愛欲領理國事而能不離如
是三昧我聞此已倍加恭敬於菩薩所生世
尊想深發阿耨多羅三藐三菩提心願於來
世亦當成就如是功德善男子我所見者如
是少分我唯知此首楞嚴三昧當有無量不
可思議功德勢力堅意白佛言希有世尊是

瞿或天子深心說此皆是如來爲作善知識
常所守護故世尊瞿或天子不久亦當住首
楞嚴三昧得是自在神變勢力如今世尊所
爲無異

堅意菩薩白佛言世尊今此會中寧有得是
首楞嚴三昧者不尔時會中有天子名現意
語堅意菩薩言譬如賈客入於大海而作是
言此大海中有摩尼珠可持去不汝語似是
所以者何於今如來大智海會其中菩薩成
就法寶發大莊嚴汝在中坐而作是問於此
會中寧有菩薩得是首楞嚴三昧者不堅意
今此會中自有菩薩得首楞嚴三昧現帝釋

身有現梵王身有現諸天龍夜叉乾闥婆阿
脩羅迦樓羅緊那羅摩睺羅伽身有得首楞
嚴三昧現比丘比丘尼優婆塞優婆夷身有
得首楞嚴三昧以諸相好而自嚴身自有菩
薩爲化衆生現作女身形色相貌有現聲聞
形色相貌有現辟支佛形色相貌堅意如來
自在隨所至衆若刹利衆婆羅門衆若居士
衆釋衆梵衆諸護世衆隨是諸衆普能示現
形色相貌當知皆是首楞嚴三昧本事果報
堅意若見如來所說法處當知此中則有無
量諸大菩薩大智自在發大莊嚴於一切法
自在行者能隨如來轉法輪者堅意菩薩白

佛言世尊我今謂是現意天子得此首楞嚴
三昧如其智慧辯才無礙神通如是佛言堅
意如汝所說是現意天子已住首楞嚴三昧
通達是三昧故能作是說尔時佛告現意天
子汝可示現首楞嚴三昧本事少分現意天
子語堅意言仁者欲見首楞嚴三昧少勢力
不荅言天子願樂欲見現意天子善得首楞
嚴三昧力故即現變應今衆會者皆作轉輪
聖王三十二相而自莊嚴及諸眷屬七寶侍
從天子問言汝見何等堅意荅言我見衆會
皆作轉輪聖王色相眷屬七寶侍從尔時天
子復現衆會皆作釋提桓因處忉利宮百千

天女作衆伎樂園遶娛樂復以神力普令衆
會皆作梵王色相威儀在於梵宮行四無量
又問堅意汝見何等答言天子我見衆會皆
是梵王復現神力普令衆會皆作長老摩訶
迦葉形色相貌能持衣鉢入諸禪定行八解
脫皆無有異復現神力普令衆會皆如釋迦

牟尼佛身相好威儀各有比丘眷屬圍遶又
問堅意汝見何等答言天子我見大衆皆是
釋迦牟尼佛身相好威儀各有比丘眷屬圍
遶現意天子謂堅意言是爲首楞嚴三昧自
在勢力如是堅意菩薩得首楞嚴三昧能以
三千大千世界入芥子中令諸山河日月星

宿悉現如故而不迫迤示諸衆生堅意首楞嚴三昧不可思議勢力如是

尔時諸大弟子及諸天龍夜叉輒闍婆釋梵護世天王同聲白佛言世尊若人得是首楞嚴三昧是人功德不可思議所以者何是人則爲究竟佛道成就智慧神通諸明我等今日於一座上普見衆會種種色相若干變現我等惟念若人不聞首楞嚴三昧當知是爲魔所得便若得聞者當知是人諸佛所護何況聞已隨說行者世尊菩薩若欲通達佛法至於彼岸當一心聽首楞嚴三昧受持讀誦爲他人說世尊菩薩若欲普現一切形色威

儀欲悉普知一切衆生心心所行又欲普知一切衆生隨病與藥當善聽是三昧法寶受持讀誦世尊若人得是首楞嚴三昧當知是人入佛境界智慧自在佛言如是如是如汝等說若人不得首楞嚴三昧不得名爲深行菩薩如來不謂此人具足布施持戒忍辱精進禪定智慧是故汝等若欲徧行一切道者當學得是首楞嚴三昧不念一切諸所學故尔時堅意菩薩問現意天子言菩薩若欲得是三昧當修行何法天子荅言菩薩若欲得是三昧當修行凡夫法若見凡人法佛法不合不散是名修習首楞嚴三昧堅意問言於

佛法中有合散耶天子荅言凡夫法中尚無
合散何況佛法云何名修行若能通達諸凡
夫法佛法無二是名修習而實此法無合無
散善男子一切法集無生相故一切法集無
壞相故一切法集虛空相故一切法集無受
相故堅意復問首楞嚴三昧去至何所天子
荅言首楞嚴三昧去至一切衆生心行而亦
不緣心行取相去至一切諸所生處而亦不
爲生處所汙去至一切世界佛所而不分別
佛身相好去至一切音聲語言而不分別諸
文字相普能開示一切佛法而不至於畢竟
盡處善男子問是三昧至何處者隨佛所至

是三昧者亦如是至堅意問言佛至何處天子答言佛如如故至無所至又問佛不至涅槃耶答言一切諸法究竟涅槃是故如來不至涅槃所以者何涅槃性故不至涅槃又問過去恒河沙等諸佛不至涅槃耶答言恒沙諸佛爲是生耶堅意言如來所說恒沙諸佛生已滅度天子言善男子如來不云一人出世多所饒益安樂衆生於意云何如來爲定得諸衆生有生滅耶天子如來於法不得生滅善男子當知如來雖說諸佛出於世間於如來相而實無生雖說諸佛至於涅槃於如來相如實無滅

又問今現無量如來得成道不荅言如來無
生無滅相如是成道善男子若諸佛出若入
涅槃無有差別所以者何如來通達一切諸
法是寂滅相是名爲佛又問若一切法畢竟
寂滅涅槃相者可通達耶荅言如一切法畢
竟寂滅同涅槃相通達相者亦復如是善男
子如來不以生住滅出生住滅是名佛出
堅意問言汝住首楞嚴三昧能作如是說耶
荅言善男子於意云何如來化人住何法中
而有所說堅意荅言乘佛神力能有所說又
問佛住何處而作化人荅言佛住不二神通
而作化人天子言如如來住不住法而作化

人諸化人亦住不住法而有所說堅意言若無所住云何有說天子言如無所住說亦如是又問菩薩云何具足樂說辯才荅曰菩薩不以我相不以彼相不以法相而有所說名具足樂說辯才隨所說法文字相不盡法相亦不盡如是說者不以二說是名具足樂說辯才又善男子若菩薩不捨諸法幻相於諸音聲不捨響相是名具足樂說辯才又如諸文字音聲語言無處無方無內無外無有所住從衆緣有一切諸法亦復如是無處無方無內無外亦無所住非是過去未來現在不爲文字言辭所表內自通達而有所說是

名具足樂說辯才譬喻如響一切音聲皆隨
響相而有所說堅意問言隨義云何善男子
隨虛空是隨義如虛空無所隨一切諸法亦
無所隨諸法無比無有譬喻爲有得者言有
所隨尔時世尊讚天子言善哉善哉如汝所
說菩薩於此不應驚怖所以者何若有所隨
不得阿耨多羅三藐三菩提

堅意菩薩白佛言世尊是現意天子從何佛
土來至此間天子謂言問作何等堅意答言
我今欲向彼方作禮以是大士遊行住處天
子謂言若人手得是首楞嚴三昧者一切世
間諸天人民皆應禮敬尔時佛告堅意菩薩

是現意天子從阿闍佛妙喜世界來至於此
是人於彼常說首楞嚴三昧堅意一切諸佛
無有不說首楞嚴三昧者堅意是現意天子
於此娑婆世界當得成佛是人欲斷此五濁
惡取淨佛土教化衆生修習增長首楞嚴故
來至於此堅意白佛言今此天子幾時當於
此間世界得成佛道其号云何世界何名佛
言是天子者過是賢劫千佛滅已六十二劫
無復有佛中間但有百千萬億辟支佛出其
中衆生得種種善根過是劫已當得成佛号
淨光稱王如來世界尔時名爲淨見於時淨
光稱王如來能令衆生心得清淨世界衆生

不爲貪欲瞋恚愚癡所覆得法淨信皆行善
法堅意是淨光稱王佛壽十小劫以三乘法
度脫衆生其中無量無邊菩薩得首楞嚴三
昧於諸法中得自在力尔時魔若魔民皆修
大乘慈愍衆生其佛國土無三惡道及諸難
處莊嚴清淨如鬱單越無衆魔事離諸邪見
佛滅度後法住千萬億歲堅意是天子者當
於如是清淨國土而成佛道尔時堅意菩薩
謂天子言汝得大利如來授汝阿耨多羅三
藐三菩提記天子荅言善男子於一切法若
無所得是名大利於法有得是則無利善男
子是故當知若不得法是名大利說是語時

二万五千天子曾於先世植衆德本皆發阿
耨多羅三藐三菩提心有万菩薩得無生忍
尔時舍利弗白佛言世尊未曾有也今說首
楞嚴三昧而是惡魔不來娆亂佛告舍利弗
汝欲見魔衰惱事不唯然欲見尔時佛放眉
間白毫大人相光一切衆會皆見惡魔被五
繫縛不能自解佛告舍利弗汝見惡魔被五
縛不唯然已見此惡魔者爲誰所縛佛言是
首楞嚴三昧威神之力在所佛土說首楞嚴
三昧其中諸魔欲以惡心作障礙者首楞嚴
三昧及與諸佛威神力故其諸惡魔皆自見
身被五繫縛舍利弗在所說首楞嚴三昧處

若我現在若我滅後其中所有諸魔魔民及
餘人衆懷惡心者以首楞嚴三昧威神力故
皆被五縛

尔時會中天龍夜叉乾闥婆等白佛言世尊
我等於此三昧心無有疑不爲障礙我等不
欲身被五縛世尊我等恭敬此三昧故皆當
往護說是法者於是三昧生世尊想佛告諸
天龍神汝以是故當於十二見縛而得解脫
何等十二我見縛衆生見縛壽命見縛人見
縛斷見縛常見縛我作見縛我所見縛有見
縛無見縛此彼見縛諸法見縛是爲十二汝
等當知若有衆生於佛法中起瞋恨心欲毀

壞者皆以住是十二見縛若人信解隨順不
逆於此十二見縛當得解脫

尔時舍利弗白佛言世尊惡魔於今得聞說
此首楞嚴三昧名不佛言亦聞以被縛故不
能得來舍利弗言如來何不以威神力令魔
不聞說首楞嚴三昧名字佛言且止勿作此
語假使恒河沙等世界滿中大火爲聞說此
首楞嚴三昧當從中過何以故若人但聞說
首楞嚴三昧我說此人大得善利勝得四禪
生四梵處舍利弗若使惡魔今得聞說首楞
嚴三昧名字以此因緣當得出過一切魔事
若以被縛而得聞者亦當於此十二見縛而

得解脫是故舍利弗邪見惡人入魔網者尚
應聞此首楞嚴三昧何況淨心歡喜欲聞
尔時會中有一菩薩名魔界行不汗白佛言
唯然世尊我今當現於魔界中自在神力令
魔得住首楞嚴三昧佛言隨意時魔界行不
汗菩薩即於會中忽然不現現於魔宮語惡
魔言汝寧不聞佛說首楞嚴三昧無量衆生
皆發阿耨多羅三藐三菩提心出汝境界亦
皆當復度脫餘人出汝境界魔即報言我聞
佛說首楞嚴三昧名字以被五縛不能得往
所謂兩手兩足及頭又問惡魔誰繫汝者魔
即答言我適發心欲往壞亂聽受首楞嚴三

昧者即被五縛我適復念諸佛菩薩有大威
德難可壞亂我若往者或當自壞不如自住
於此宮殿作是念已即於五縛而得解脫菩
薩荅言如是一切凡夫憶想分別顛倒取相
是故有縛動念戲論是故有縛見聞覺知是
故有縛此中實無縛者所以者何諸法無縛
本解脫故諸法無解本無縛故常解脫相無
有愚癡如來以此法門說法若有衆生得知
此義欲求解脫勤心精進則於諸縛而得解
脫時魔衆中七百天女以天香華末香塗香
及諸瓔珞散魔界行不汙菩薩而作是言我
當何時於魔境界而得解脫菩薩報言汝等

若能不壞魔縛則得解脫云何名爲魔縛謂
六十二見若人不壞此諸見者即於魔縛而
得解脫天女復言云何名爲不壞諸見而得
解脫荅言諸見本無所從來去無所至若知
諸見無去來相即於魔縛而得解脫諸見非
有非無若不分別有無即於魔縛而得解脫
若無所見是爲正見如是正見無正無邪若
法無正無邪無作無受即於魔縛而得解脫
是諸見者非內非外亦非中間如是知見亦
復不念則於魔縛而得解脫七百天女聞說
此法即得順忍而作是言我等亦當於魔界
中行無所汙度脫一切魔所縛者

尔時魔界行不汗菩薩語惡魔言汝諸眷屬
已發阿耨多羅三藐三菩提心汝作何等惡
魔答言我被五縛不知所作菩薩答言汝發
阿耨多羅三藐三菩提心當從此縛而得解
脫時諸天女慈愍魔故皆作是言可發阿耨
多羅三藐三菩提心勿於安隱生怖畏想勿
於樂中而生苦想勿於解脫而生縛想尔時
惡魔生諂曲心而作是言若汝捨離菩提心
者我當發心時諸天女以方便力而謂魔言
我等皆已捨離此心汝便可發阿耨多羅三
藐三菩提心若一菩薩發菩提心一切菩薩
亦同是心所以者何心無差別於諸衆生心

皆平等。尔時惡魔謂魔界行不汙菩薩言我
今當發阿耨多羅三藐三菩提心以是善根
令我縛解。說此言已即自見身從縛得解時
魔界行不汙菩薩以神通力放大光明現淨
妙身照於魔宮。魔自見身無有威光猶如墨
聚時魔衆中二百天女深著婬欲見此菩薩
身色端正起染愛心各作是言是人若能與
我從事我等皆當隨順其教。時此菩薩知諸
天女宿緣應度即時化作二百天子色貌端
嚴如身無異又作二百寶交露臺勝魔宮觀
是諸天女皆自見身在此寶臺各各自謂與
此菩薩共相娛樂所願得滿。婬欲意息皆生

深心愛敬菩薩菩薩即時隨其所應而爲說
法皆發阿耨多羅三藐三菩提心時魔界行
不汙菩薩謂惡魔言汝可詣佛魔作是念我
縛已解當詣佛所壞亂說法尔時惡魔眷屬
圍繞行詣佛所白言世尊勿復說是首楞嚴
三昧所以者何說是三昧我身即時被五繫
縛唯願如來更說餘事時堅意菩薩謂惡魔
言誰解汝縛答言魔界行不汙菩薩解我繫
縛汝許何事而得解脫魔言我許發阿耨多
羅三藐三菩提心

尔時佛告堅意菩薩今是惡魔爲解縛故發
菩提心非清淨意如是堅意我滅度後後五

百歲多有比丘爲利養故發菩提心非清淨
意堅意汝觀首楞嚴三昧勢力佛法威神是
諸比丘比丘且優婆塞優婆夷以輕戲心貪
利養心隨逐他心聞是三昧而發菩提心我
皆知此心與阿耨多羅三藐三菩提得作因
緣何況聞是首楞嚴三昧能以淨心發阿耨
多羅三藐三菩提當知此人於佛法中已得
畢定堅意菩薩白佛言世尊今此惡魔聞說
首楞嚴三昧爲解縛故發菩提心亦得具足
佛法因緣耶佛言如汝所說惡魔以是三昧
福德因緣及發菩提心因緣故於未來世得
捨一切魔事魔行魔諂曲心魔衰惱事從今

以後漸漸當得首楞嚴三昧力成就佛道堅
意菩薩謂惡魔言如來今已與汝受記魔言
善男子我今不以清淨心發阿耨多羅三藐
三菩提如來何故與我受記如佛言曰從心
有業從業有報我自無心求菩提道如來何
故與我受記時佛欲斷衆會疑故告堅意言

菩薩受記凡有四種何謂為四有未發心而
與受記有適發心而與受記有密受記有得
無生法忍現前受記是謂為四唯有如來能
知此事一切聲聞辟支佛所不能知堅意云
何名為有未發心而與受記或有衆生往來
五道若在地獄若在畜生若在餓鬼若在天

上若在人間諸根猛利好樂大法佛知是人
過此若干百千万億阿僧祇劫當發阿耨多
羅三藐三菩提心又於若干百千万億阿僧
祇劫行菩薩道供養若干百千万億那由他
佛教化若干百千万億無量衆生令住菩提
又過若干百千万億阿僧祇劫當得阿耨多
羅三藐三菩提号字如是國土如是聲聞衆
數壽命如是滅後法住歲數如是佛告堅意
如來悉能了知此事復過於是是名未發心
而與受記

尔時長老摩訶迦葉前白佛言從今以後我
等當於一切衆生生世尊想所以者何我等

無有如是智慧何等衆生有菩薩根何等衆
生無菩薩根卅尊我等不知如是事故或於
衆生生輕慢心則爲自傷佛言善哉善哉迦
葉快說此言以是事故我經中說人則不應
妄稱量衆生所以者何若妄稱量於他衆生
則爲自傷唯有如來應量衆生及與等者以
是因緣若諸聲聞及餘菩薩於諸衆生應生
佛想適發心已得受記者或自有人久植德
本修習善行動心精進諸根猛利好樂大法
有大悲心普爲衆生求解脫道是人發心即
住阿惟越致入菩薩位墮畢定數出過八難
如是等人適發心時諸佛即與受阿耨多羅

三藐三菩提記名号如是國土如是壽命如是如是等人如來知心而與受記是名發心即與受記密受記者自有菩薩未得受記而常精勤求阿耨多羅三藐三菩提樂種種施樂一切施受法堅固持戒不捨深發莊嚴有大忍力等心衆生勤行精進求諸善法身心不懈如救頭然行念安隱能得四禪樂求智慧行佛菩提久行六度有成佛相時餘菩薩天龍夜叉輒闍婆等皆作是念如此菩薩勤心精進實爲希有幾時當得阿耨多羅三藐三菩提其号云何國土何名聲聞衆數多少云何佛爲斷此衆生疑故而與受記普令衆

會皆得聞知唯是菩薩獨不得聞佛神力故
令一切衆知是菩薩成佛号字國土如是聲
聞衆數多少如是衆所疑者時悉決了於此
菩薩生世尊想而是菩薩不能自知我爲得
記爲未得記是爲菩薩密得受記現前受記
者有菩薩久集善根無不見得常修梵行觀
無我空於一切法得無生忍佛知此人功德
智慧悉已具足則於一切天人魔梵沙門婆
羅門大衆之中現前受記作是言善男子汝
過若干百千万億劫當得成佛号字如是國
土如是聲聞衆數壽命如是時無數人隨效
是人皆發阿耨多羅三藐三菩提心是人佛

前得受記已身昇虛空高七多羅樹堅意是
名第四現前受記

尔時堅意菩薩白佛言今此會中寧有菩薩
以此四事得受記不佛答言有世尊誰是佛
言此師子吼王菩薩樂欲居士子是未發心
而得受記如是等他方世界無數菩薩亦未

發心而得受記復有寂滅菩薩大德法王子
菩薩文殊師利法王子菩薩如是無量諸菩
薩等適發心時即與受記皆住阿惟越致地
中是中復有智勇菩薩益意菩薩如是無量
諸菩薩等密與受記堅意我及弥勒賢劫千
菩薩皆得無生法忍現前受記堅意菩薩白

佛言希有世尊菩薩所行不可思議受記亦不可思議一切聲聞諸辟支佛尚不能知況餘衆生佛言堅意菩薩所行所發精進威神勢力不可思議

今時魔界行不汙菩薩所化天女令發阿耨多羅三藐三菩提心者各以天華散於佛上白佛言世尊我等不樂密得受記我等願得無生法忍現前受記唯願世尊於今與我受阿耨多羅三藐三菩提記佛時微笑口出種種妙色光明照諸世界還從頂入阿難白佛言世尊何因故笑佛告阿難汝今見是二百天女合掌敬禮如來者不巳見世尊阿難是諸

天女已曾於昔五百佛所深種善根從是已
去當復供養無數諸佛過七百阿僧祇劫已
皆得成佛号曰淨王阿難是諸天女命終之
後得轉女身皆當生於兜率天上供養奉事
彌勒菩薩尔時惡魔聞諸天女得受記已白
佛言世尊我今自於所有眷屬不得自在以
聞說是首楞嚴三昧故況餘聞者若人得聞
首楞嚴三昧即得畢定住佛法中尔時天女
以無怯心語惡魔言汝勿大愁我等今者不
出汝界所以者何魔界如即是佛界如魔界
如佛界如不二不別我等不離是如魔界相
即是佛界相魔界法佛界法不二不別我等

於此法相不出不過魔界無有定法可示佛
界亦無定法可示魔界佛界不二不別我等
於此法相不出不過是故當知一切諸法無
有決定無決定故無有眷屬無非眷屬尔時
惡魔憂愁苦惱欲還天上魔界行不汙菩薩
謂惡魔言汝欲何去魔言我今欲還所住宮
殿菩薩謂言不離是衆即是汝宮殿尔時惡
魔即自見身處本宮殿菩薩語言汝見何等
惡魔荅言我自見身處本宮殿好林園池是
我所有菩薩語言汝今可以奉上如來魔言
可尔適作是語即見如來聲聞菩薩一切大
衆皆在其中說首楞嚴三昧

尔時阿難白佛言世尊佛所住處說首楞嚴
三昧有施食已佛得成道此二施主何者福
多佛言阿難施佛食已佛成阿耨多羅三藐
三菩提食已轉法輪食已說首楞嚴三昧此
三食福無有差別阿難我於何處得阿耨多
羅三藐三菩提當知其處即是金剛過去未
來現在諸佛皆於其中得成佛道隨所住處
說首楞嚴三昧等無差別及有讀誦書寫之
處亦復如是阿難施佛食已初轉法輪若有
法師得施食已讀誦說是首楞嚴三昧此二
施福等無有異又復阿難佛住精舍以十八
種神通變化度脫衆生復有精舍於中讀誦

說是首楞嚴三昧此二福處其福不異

尔時阿難語惡魔言汝得大利能以宮殿施佛令住魔言是魔界行不汙菩薩恩力所致堅意菩薩白佛言世尊是魔界行不汙菩薩住首楞嚴三昧神力自在乃如是乎

佛言堅意如汝所說今此菩薩住是三昧能以神力隨意自在示現一切行魔界行而能不為魔行所汙與諸天女現相娛樂而實不受姪欲惡法是善男子住首楞嚴三昧現入魔宮而身不離於佛會現行魔界遊戲娛樂而以佛法教化衆生

佛說首楞嚴三昧經卷中

卷中

婆若

下而反

益

字鋒

迫

上音伯

闕

二同

昌

六反

得



送人

